

Li dèsaïze du vieü tin

Vouo sovèni vouo du vieü tin, in Boueugnonne, kin l'avive kè li vatse dè Laïtron, din hla moutagne.

I l'ére a pou pri vè la fin du maï dè sètibre, li dzornive son inkouo bale, mi li ni son frètse, é l'êrbe di z'alpâdze l'è ripâye, l'è sin kiè djon li bardjé, kê i son troua restô lontin a la moutagne : sin dzo a pou pri, i leu fô bâ vouor.

Le dzo dè dèsaïze, pè vè li katre eure du matîn, li tsargouose atèlâye dè vatse, dè bouoyon u dè mouelè, prinz'on le tsemîn dè damou. U bè dè traï z'eure dè moutâye, i l'âruv'on dékout le boueu dèvan la tsavane. Li bitche son détèlâye, on vôte li dzeü, li bouoré, é on leu baye dè fin u d'avéne.

Tsekon sè siète onna vouerbe, pouo medjé on morsé é baïre onna gouolô dè vîn u dè garzîn. Pè vè li voueu t'eure, li tsardzayîn é le pâtre fon le partâdze a tchui li z'alpateu: du fremadze, du bure é du sèri kiè leu revîn.

I dépouoz'on to sin din la binde é l'akouesen'on avoui dè fin u dè paye. Hleü kiè l'on to rèsu bèy'on inkouo onna gouolâye, mèt'on onna fleu u tsapé é l'inmouod'on avoui li tsargouose du lô dè Nôvronne.

Fô alâ bâ tsôpou, parskè le tsemîn l'è raïde é étraï, i sarâye damâdze dè vouedjé la binde. Arevô bâ u mayin, i s'arét'on pouo tornâ baïre on vaïre u dou, din on kâfé. I prèdz'on dè to: dè la dèsaïze, di venindze, di kayon, di prô, di dzeu, dè l'inkouerâ è di fèmale. I l'a to kè pase. Dèvan d'itre troua étorne, i l'inmouod'on du lô dè la maïzon, fiê min dè raï, siètô su on sa dè fin, pouozô su le dèvan dè la binde. Apri avaï remizia to sé danré, i von sepâ é dreimi, bon étorne é bîn lagna, mi kontin d'avaï fi onna bouone é bal'a rezerve pouo l'ivê.

Li dèsaïze du vieü tin no z'on lasia dè biô sovèni.

Michèl Rodjeu